

TSHOOJ XXIII: Tus Txiv Neej Yuav Nws Xeem

Tus txiv neej thiab poj niam uas yog ib xeem sib yuav tsis tau. Qhov no txhaum Hmoob lub neej. Tus neeg twg nws yuav nws xeem muaj kev txhaum thiab txoj kev txhaum phua raws li no:

1. Txwv tsis pub ob tog niam txiv yug ua plaub ua ntug. Nkawd tsis muaj kev txhaum.
2. Ob tug neeg sib yuav no txhaum cai yuav tsum tau muab ib tog \$3,600.00 los kho ob tog niam txiv thiab kho nom kho tswv txawm kho tag lawm los txwv tsis pub ob tug neeg no sib yuav hlo li.
3. Txwv tsis pub ob tog niam txiv ua tshoob ua kos thiab sau nqi tshoob nqi kos. Yog ob tog niam txiv tseem koom tes los ua tshoob ua kos, txhais tau hais tias ob tog niam txiv ua txhaum Hmoob txoj cai.
4. Yog rooj plaub li hais los saum no tuaj txog 18 Xeem lawm ob tog neeg yuav tsum muab ib tog \$720.00 los kho Hmoob 18 Xeem

TSHOOJ XXIV: Tsim Txom / Ciav Nyab Cob Ntxhais

- A. Cov plaub ntug no yuav muaj xws li txiv tsev tsim txom niam tsev, los niam tsev tsim txom txiv tsev, los niam thiab txiv tsim txom me tub me nyuam. Feem plaub ntug no yuav muaj kev txhaum rau hauv tsoom fwv. Hmoob 18 Xeem yuav soj ntsuam saib seb puas tsim nyog daws tau, yog tias tsis tsim nyog, tus tswv plaub yuav tau mus cuag tsoom fwv.
- B. Yog ib tug niam tais yawm txiv twg cob ntxhais, thiab muaj pov thawj pom tseeb lawm, niam tais yawm txiv yuav tsum tau thim nqi tshoob rov qab rau tus vauv.
- C. Yog ib tug niam pog txiv yawg twg ciav nws tus nyab, thiab muaj pov thawj tseeb lawm, niam pog txiv yawg yuav tsum tau xuam nqi tshoob rau tus nyab yam dawb paug.
- D. Yog nkawm niam txiv twg muaj teeb meem li hais los saum no, thiab tau sib tua tuag, niam tais yawm txiv, niam pog txiv yawg yog leej twg tsim muaj qhov teeb meem yuav raug kho \$1,200.00 raws li txoj cai A txog C tsooj III.